

2

640458

(1)

時
輪
金
剛
法
會
殿
言

時輪金剛法會殿言

時輪金剛灌頂道場。自民國十月二十一日啓修。迄二十八日圓滿。先後重勞中外善信臨場隨喜。作大因緣。殷重虔誠。同深感佩。祇以草創事冗。建置未周。聖教深宏。驟難理會。於是呵責疑謗。雜然并興。同人洗心聽受。凡所稱譏。皆爲善友。唯有感激奮勉。克勵以報。用抒管見。依稀聖言。願諸宏碩。善抉擇焉。

一、佛陀教法難信難入。釋迦如來爲一大事因緣。出興於世。其所宣暢。一代時教。三藏五藏。乃至恆沙名句文身。非算數所能譬喻。我輩鈍根劣

識窮數十寒暑之功。幸有所獲。不過大地一塵。況法海深淵。非書可入。信念未堅。解終多咎。往哲謙抑。專攻一門。達摩傳心。面壁九年。趙州自禪。八十猶行脚。永明聖哲。晝夜勤百八事。清涼垂老。製華嚴疏鈔。既成。慮文不美備。轉治經史者三年。其孜孜研求。終身若不及如是。而况泛濫十宗。馳騁衆流。如智者、羅什、玄奘、義淨諸大德。殆曠世之英傑。中資不堪。何論庸俗。末世障重。真具正信。獲勝解者。誰耶。

二、密宗理事微妙難知。密乘東漸。輒住宮庭。流耀百年。旋就淪沒。禪宗省事。行者樂從。淺執空談。謂爲究竟。元明清季。代持真言。亦祇限於內府。



民間例不得聞。入民國。有大勇持松二師。留學三島。得弘法大師唐代資回金胎二部全法。歸餉緇素。始知金剛灌頂之名。而奧旨口訣。多遺而未宣。同時多傑喇嘛、白喇嘛、金剛佛、亦持藏密略軌。教化南北。惜未能盡宣密蘊。蓋阿含談生滅。方等談無生。華法涅槃談無作。華嚴談無量。唯真言道法。方談法爾。具足無盡莊嚴。色心不二。當相即道之。即身成佛法門。威儀進止。無非印契。鳴噪吹響。皆爲真言。貪瞋痴慢。俱是大日如來等流法身。凡顯教事理。無不攝盡。三摩地法。餘教闕而不書。斯誠諸佛之密藏。十地菩薩不得究竟。豈少善根所能見聞。佛門寡學之士。輒望生疑慮。又奚

怪太和殿前之議論紛拏耶。

三、時輪密法殊勝因緣。釋迦佛成道翌年三月。別現時輪金剛身於南印度德聚楞塔中。其時印度之北香拔喇國王月善。爲請法主。率諸小國王殷重禱求。乃蒙時輪金剛下現法性敕壇城。上現德聚星宿壇城。爲月善等衆灌頂。并說時輪金剛根本經一萬二千頌。月善回國建五寶壇。振導羣倫。舉國信從。於是本法專住香拔拉國。後八百年。傳至印度。距今九百年前。復流入藏衛。系系相承。未嘗中斷。疏注軌範。代有增益。清乾隆時。班禪雖曾入覲。亦只修上樂等金剛法。同人不敏。依安欽呼圖克圖之指。

示始知今日護國息災。時輪法最爲當機。於是結衆發心。恭敬禮請。承班禪大師允可。山袞却辛。上師指導。經營年餘。迺成斯會。更發願翻譯時輪經疏。以爲華夏常住。以其中成佛方便。殊勝至極。所述日月星象軌度之事。多天文家所未發明。而於色心不二。無盡莊嚴之旨。俱於自身官能脉絡中一一配示。以發揮其博厚高明。即事而真之妙用。西方雖早譯此經。以無師承。不得受用。有德人雷興英人克倫普各製專論紀其事。盛稱本法之希有。與大師修養之崇偉。之二氏者。於梵藏佛典。研求有年。故稱揚讚歎不置。日本東密根本道場高野山。特派清澄芳澄兩阿闍黎入壇作

禮訪問。歐美新聞紙，連日詳載法會本末。李石曾先生且由巴黎電平。主保存時輪壇城。以爲攷鑑。猗歟盛哉。希世之因緣也。

四、公開灌頂廣結衆緣。時輪法爲藏密第四級無上密宗之首。唯班禪大師堪任傳授。有志專修者。固知爲至尊無上。即向不聞佛法。而一經時輪灌頂。亦深種善根。決定往生香拔拉國。同人重憫自他身世之劇苦。爲無量善信作增上緣。仰賴班禪大師哀憫攝受。大開方便。行未曾有之公開授法。明知集衆數萬。綱紀爲難。而一體銷融。不加制限。蓋欲藉以普濟人天耳。豈有他哉。

五、密宗戒律首重師承。集數萬人施灌頂法。在中土本屬創舉。依密宗戒條。凡一字一句。一事一物。未經上師傳授許可者。輒不得讀誦轉說或自用。預備法也。菩薩戒也。密宗戒也。吉祥草也。金剛繩也。金篋也。淨水也。甘露加持也。莊嚴金剛薩埵之服飾花鬘也。頓斷煩惱知見之智慧弓箭也。釋迦如來授記作佛也。自觀也。本尊觀也。壇城觀也。入壇親禮本尊也。本尊導領繞壇翔視也。爲說真言也。敕予相應法也。以及七種灌頂。十二種預備次第。上師曾一一授可。而聞者以文言隔闕。莫知所云。其信三寶者。又多未習藏密灌頂程式。事先之不得敷揚。不得分給者。密戒如是。更

以密宗名相義蘊。俱極深邃。三乘行人。猶難了知。必也於顯教大小性相之差別。與一二三級密法之事相教相。及無上密宗其他諸尊之事理本末。精研無遺。而後聽聞斯法。乃得其妙。明知解者寥寥。而廣攝泛引。不加揀擇者。惟願大衆聞在本識。作未來修學時輪之因緣耳。

六、施主請法爲協衆機。如來說法。總依勸請。不問自宣。其例特罕。上師升座。首被當機。其中發起首要諸善士。各於本法倡導維護。因緣較深。以之領衆聞法。實合佛制。丹墀容積。可衆五千。太和門內。俱是壇場。以十倍之衆。盡置階上。勢不可能。乃以紅白標幟。分別部居。或以爲分階級。背平

等。殆未從實際著想。耳至本會用費。概由各施主捐助。將刊徵信錄公表之。既結難捨能捨之善緣。復於無上密法種金剛種子。更以莊嚴壯麗。甚深微細之道場法式。予中外人士以至美快之觀感。一香一花。一物一色。俱足使人心曠神怡。油然而充沛其祥和安恬之氣。善哉斯法。義利無邊。近頃某縣之戰。某夜雙方各發炮二千響。其此一夜所耗炮彈之總值。移辦一時輪法會而有餘。其他歷年內爭。與公私豪侈無益之費。况復過是百千億萬倍。用之吉祥。則費小而利大。用之凶殘。不惟糜費萬億。而爲害之烈。雖洪水猛獸。不足爲喻。其輕重得失之機。爲何如耶。

七、佛法了義唯在利他。小乘自了。容有逃世之譏。大乘行人。利他爲事。六度四攝。無非饒益有情。如班禪大師宣化邊陲。赤誠衛國。常懷謙下。惕厲精勤。入平以來。每日清晨上座。日晡罷修。苦心調度。必求如法。以夙世明慧。通達顯密一切法義。視衆生苦厄。如同身受。久遠劫來。發大悲願。爲諸有情。生死長夜。作熾然明炬。悲智雙運。人天宗師。烏可以消極迷信。目之。入壇之衆。一聞梵唱鈴音。至少可息麤重惡念。以是因緣。消除苦業。增長善根。一切含識。並蒙其利。現集善因。必獲未來安樂善果。祇此一念清淨。其功德不可思議。若將殺人放火之徒。置之太和殿中。一剎那間。其殘

忍酷毒之用心。必銷失秦半。此可証驗而得。儒重反省。道重冥觀。佛重懺悔。莫不由不刊之眞理。而範爲外慚內疚之儀文。非愚民之具也。如病熱狂。清解尙矣。轉服辛劑。病益不支。今之世。其狼狽周章。鹵莽滅裂爲何如。從無有恐懼修省。行大乘行者。同人果何所爲而興斯會。誠不勝其感慨痛悼者矣。

八、大乘佛法不捨世法。日本之占東三省。固由於其貪嗔痴三毒現行。亦實爲其地其時衆生共業之所感。國人高呼以武力收復失地者久矣。不因時輪法會以阻其實行。同人生長斯土。不捨親緣。內懷慈悲。外現威

猛。哀其狂愚而排牴之。冀以洗其貪欲之重垢。而復其敬愛之良知也。於是聲援義勇軍。而糾正其紀律。呼號朝野有心之士。誓結羣力。消弭共業。復深知欲禦外侮。先止內爭。卻關外敵易。除心中賊難。自淨其意。萬事可成。心不清明。災禍立至。事似迂回。效捷影響。或疑佛法足使人倚賴神權。乃至重一己禍福。不肯捍衛國家。是又不然。視衆生如一子。捨身命入地獄。窮未來劫。拔置一切有情於究竟安樂之地而後已者。佛陀之徒也。或爲勳名榮貴。或出於情之不得已。見危授命。臨事而懼。冀求天下得所者。孔老之徒也。張脉憤興。逞一朝之忿。結烏合之衆。挾縱橫之術。暴戾恣睢。

以與敵人從事。未交兵而先自潰亂。卒貽國家社會之大戚者。義和團之徒也。何去何從。願疑者下一轉語。佛法尊重自力自度。深斥神權天命之說。稍治內學者知之。以外道相似之法。評駭聖教。非通論也。

九、佛法全體從理智出。佛爲正覺。簡其邪知。佛爲大覺。簡其小慧。佛說因果。說空有性相。說戒定慧。說陀羅尼。乃至說神通變化。世典技藝。無一不從其證成之。正徧知海任運流出。如鏡照物。如日懸空。言皆如實。無飾無隱。我輩曲見拘墟。實非理智。以妄想顛倒故。無明流轉。長夜不息故。知見滿腹。憧憧往來。無片刻清淨故。宇宙萬有。科學之已解決者幾何。解決

而至於最後決定者。又幾何。眞理無窮。知識有限。安得謂宇宙眞理。盡在於斯。佛陀知見。出於實證。即以因果論。佛說如是因。生如是果。同因不生異果。異因不生同果。共因共果。別因別果。過去善惡因。生現在苦樂果。現在善惡因。生未來苦樂果。又復互爲因果。前後相望。重重攝入。而不雜亂。不從自生。不從他生。不俱生。不無因生。一切法從因緣生。生而無生。性非有故。無生而生。相不無故。離於斷常有無二邊。以談因果。斯名中道。斯名理智。般若說因果不可得。重在破執。而必同時宣說業果不壞。以因果不壞故。種煩惱因。得生死果。種解脫因。得涅槃果。種菩提因。得佛果。乃至種

地獄因。得地獄果。種人天因。得人天果。因果既明。乃以種種方便。示令衆生止惡離苦。修善得樂。從初發心。乃至成等正覺。滴滴皆以因果爲本。而不執著。甚矣因果律之真實不虛也。冥想玄思。造爲天命世運之曲說。導衆生入迷途者。外道也。如來當日呵斥勝論、數論、自然、諸師。令其傾服。正爲此耳。講科學者謀真理之發現。求人羣之幸福。是矣。其用心如何。其方便如何。是不能不賴於佛陀精妙忠實之指示也。

十、中國今日正需佛法。論政者。已知政治之壞。由於人心不古。故思用曾胡律已治人之方。以楷模天下。行之數月。而人自私自利如故。更用法

家之術。嚴刑峻罰。而其效不章。是豈策之左耶。抑以紀綱久隳。正氣銷亡。情欲充塞。廉恥道喪。人人習於苟且因循。放縱卑劣之一途。不畏因果。不明是非善惡。有以致之耳。唱物質論者。又鋪張揚厲而助之攻。塚可發也。惡其厚葬也。財可劫也。惡其多金也。男女戀愛。設爲講座以誘致之。婢妾私合。刊爲要聞以游揚之。街談巷議。無非淫盜之情。爾詐我虞。儼同修羅之所。苦哉衆生。云何振拔。曰正人心。正之道。曰彰因果。殺人者。人亦殺之。淫人之妻者。其妻不貞。盜人之財者。官吏捕得。按罪追贓。如是因。生如是果。善惡是非因果不昧之道。果大白於天下。天下不足平矣。傑出之士。

更依聖教。悲智雙修。厚植德本。以出世三學培其基。以世間學術宏其用。務使朝野上下。皆具有慈祥愷悌。偉大崇閎之氣識。其所積者既厚。其所推行者。必克經綸天地。範圍古今。燦爛光華。無往不利。凡國家賞罰黜陟之果。無不與實際貪廉勤惰是非功罪之因相符契。庶幾科學昌明而絕其弊。人人棄惡從善而遠於奸欺。善哉班禪大師開示曰。政治與宗教。須並行不悖。而今日宗教之急務。在明善惡因果。其言約。其旨深矣。本真理以建因果。因果即是真理。本因果以講政治。政治即是因果。試縱觀之。德國各大學。教授印藏哲學之講座有八。英法政府。俱以數十年之經營。翻

譯一切梵藏經論。并製英藏法藏字典。以爲修學之資。英法德科學之國也。不以印藏文化爲無益。而重視之。日本維新。不菲薄佛教。復從而光大之。各宗大學以十計。定期刊物。多至四十餘種。本部五千萬人民。其真實皈依三寶者。達八百萬。文學界曾以二百萬之集資。刊印大正藏經。其經營佛像、法器、服飾、莊嚴具、之會社若干家。資本多在數十百萬以上。不聞有人詆爲迷信。爲浪費。爲開倒車。爲亡國之徵。說者謂日本維新成功。全由於攻陽明學者之努力。陽明學者。佛學之外胤也。其知行合一之說。特人天學處之緒餘耳。用之尙可濟國家于富強。而况巍巍龍藏。炳耀人間。

如珠在衣。取用無盡。西洋人困于科學之謎。窮途趙趙。方于梵藏故紙中。求出路。環顧神宇。有寶不識。甘守窮餓。其謂何哉。

右陳十義。爲答客難。勝義未申。酬對且止。

若夫時輪本法之軌持密義。大小顯密之總別性相。一已修持之方便次第。義例繁複。屬之專篇。有志宣陳。俟諸異日。然後稽首和南十方三世一切三寶。而作誓言。凡諸衆生。毀謗三寶。輕慢本法者。應得苦果。我皆代受。令彼即身往生香拔拉樂國。爲神武輪王。作大眷屬。救護一切。乃至法界平等利益。法會圓滿後第三日製

2
640458
17